

IDEIS

L'ateneu furlan prin de file intun program cu la Slovenie pal restaur dai centris storicis.

Par tornâ a fâ biei 31 comunis di confin

Ricualificâ i comunis di confin cu la analisi dal patrimoni architetonico e la realizazion di liniis vuide pai interventis di restaur intai centris storicis transfrontalirs: al è un dai obietifs prioritaris di "PratiCons", o sedi "Pratichis di conservazion dal patrimoni architetonico".

Il projet, che al à vîncût il bant pe Cooperazion transfrontaliere Italie-Slovenie 2007-2013, al à otignût un finanziament di cuasi 690.000 euros e al viôt l'ateneu furlan in prime liniis cul dipartiment di Storie e tutele dai bens culturâi

tant che prin de file e la partecipazion dal dipartiment di Sciencis economicis e statisticis. E partecipe ancje la Sorintendence pai bens architetonics e paisagjistics dal Friûl Vignesie Julie, intant che de bande slovene a son la universitàt di Gnove Gurize (Program Etikakd), la Agenzie di svilup regional Idrisko-Cerkljanska razvojna agencija d.o.o. Idrja e il Comun di Idrie, dulà che al sarà fat ancje il prin cantir pilote.

La iniziative, sot de responsabilitât sientifiche di Donata Battilotti, professore di

Storie de architeture dal ateneu furlan, e previôt la realizazion di manuâi cu lis liniis vuide dai interventis di restaur intai centris storicis transfrontalirs, la analisi dal marcjât transfrontalir intal setôr dal restaur cu la rilevazion des impresis che a operin in chest cjamp e la elaborazion di un strument di certificazion ad hoc, la creazion di un sisteme informatif gjeografic su internet cui dàts teritoriâi, la attivazion di cors di formazion pe conservazion e pe gjezion dal patrimoni costruit e un plan di comunicazion di dute la operazion.

La aree di studi e cjaparâ dentri 31 comunis sul confin italosloven des provinciis di Triest, Gurize e Udin e de region Goriska, di chei 18 comunis talians a confin cu la Goriska (Tarvis, Scluse, Resie, Taipane, Pulfar, Savogne, Drencje, Grimac, S. Lenart, Prepot, Dolegne, Cormons, S. Florean, Gurize, Savogne dal Lusinc, Doberdò, Duin e Sgonic) e 13 comunis de Goriska (Aidussine, Cjanâl dal Lusinc, Cjaurêt, Circhina, Cuel, Idria, Merne - Castagnevize, Gnove Gurize, Plezzo, Ranziano - Voghersca,



Sant Pietro-Vertoiba, Tulmin e Vipau). "A son comunis di confin - e sotlinee la architecete Alessandra Biasi, coordinadore dal projet - ma nol è escludût che la investigazion e puedi jessi slargjate a altris comunis dongje, intant che la investigazion sui caratars architetonics si focalize su la zone di Gurize ma l'intindiment al è di slargjale a dut il confin cu la Goriska".